

Coudiye la couleue di joueu di mèinoù tsandze aprì que son nèissui ?

La couleue di joueu veun de salla partiya coloraye que lèi diyon iris. Dedeun l'iris di joueu lèi son de sellule pigmantère que produèison eun pigmàn neuve que lèi dion mélanina (la pi é le pèi étó l'an la couleue baillaye pe la mélanina).

Se la cantitò di sellule pigmantère l'è bièn ata, l'iris di joueu l'a an couleue bruna ou nèye. Eunna petchouda cantitò de salle sellule pigmantère produèi eunna couleue que teurrie sui lo dzano. Se, i contréo, lo nombro l'è bièn bâse, l'iris l'è d'an couleue grize ou perse, que l'è pa d'atro que la couleue di sellule de l'iris vuye eun trasparanse.

Eun micllèn lo dzano avouì lo perse no acapèn totte le tonalitò de couleue, di vèe tanque i ros fonchè.

Le mèinoù can nèisson l'an caze tcheutte le joueu perse perqué l'iris l'a panco le sellule pigmantère. Avouì lo ten la couleue di joueu tsandze perqué comenchon a se fourmì le pigmàn de l'iris.

L'è pa lèin-o d'eundovin-ì queunta sarè la couleue di joueu djeusto nèissui. Le mèinoù que nèisson dza avouì le joueu squeue l'è bièn fasilo que le vardèyan teuppe, i contréo le mèinoù que dedeun le premì mèise de viya l'an le joueu perse, pouioun le veure, tchica pe cou, vegnì pî teuppe.

Aprì le premì chouì mèise, l'an de ten, la couleue di joueu tsandze pami, mimo se dedeun le premì dou-z-àn de viya serten-e tonalitò pouyoun euncò èi de petchoù tsandzemèn.



lo gnalèi



Région Autonome
Vallée d'Aoste
Regione Autonoma
Valle d'Aosta

Assessorat de l'Éducation
et de la Culture
Assessorato Istruzione
e Cultura

Tiré de :

Philippe Chartier, www.cybersciences.com

Texte publié en 2008 sur « Liaison » - Bibliothèque de Charvensod

Collaborateur de Charvensod pour la traduction : Nicole Bollon

La transcription a été soignée par le Guichet Linguistique

Mise à jour de la graphie : octobre 2013